


ՀՈՒՄԱՆԻԶՄԻ ՁԱՏԱԳՈՎԸ

Գ. ԱՍԱՏՐՅԱՆ, Հումանիզմը նոր հազարամյակի հիմնախնդիրների
համատեքստում, Ե., ՀՀ ԳԱԱ «Գիտություն» հրատ., 2014, 459 էջ:



Հյուսիսային համալսարանի գիտական
խորհրդի և Հումանիզմի պրոբլեմների ակա-
դեմիայի նախագահության որոշումներով ՀՀ
ԳԱԱ «Գիտություն» հրատարակչությունը
վերջերս լույս ընծայեց Գրիգոր Ասատրյանի
«Հումանիզմը նոր հազարամյակի հիմնա-
խնդիրների համատեքստում»
ստվարածավալ աշխատությունը: Մե-
նագրության հրատարակումը հովանավորել
է գիտությունն ու արվեստն արժեքորոշ,
խկական մտավորական Վլադիմիր
Գասպարյանը: Գիրքը մի յուրահատուկ
նվեր է վաստակաշատ գիտնականի ու
մանկավարժի գալիք հոբելյանին և կարծես
ամփոփումն ու հանրագումարն է
հումանիզմի հիմնախնդրի վերաբերյալ նրա
բազում տարիների անդամական և բեղուն

աշխատանքի: Ուսումնասիրությունը նվիրված է նոր հազարամյակի հիմ-
նախնդիրների համատեքստում հումանիզմի քննական վերլուծությանը: Այն
ունի ընդարձակ ներածություն, հինգ ծավալուն գլուխ և վերջաբան:

Ներածության մեջ Գ. Ասատրյանը փորձում է հիմնավորել հիմնախնդրի
արդիականությունը, սահմանում է հետազոտության առարկան, մեթոդաբա-
նությունը, որի հիմքում ընկած են ուսումնասիրության մի շարք փիլիսոփա-
յական և գիտական սկզբունքներ, հստակ ձևակերպում է առաջադրված նպա-
տակը, հիմնական խնդիրները, հակիրճ ներկայացնում հիմնախնդրի
դրվածքն ու լուծումները պատմական տարբեր ժամանակաշրջաններում,
թվարկում աշխատության այն նորույթները, որոնք առաջին անգամ են կի-
րառվել և արժևորում են այդ գաղափարների գործնական նշանակությունը:

Աշխատության առաջին «Արդի հումանիզմի ակունքները» գլխում
հեղինակը քննության է առնում հումանիզմի զարգացման պատմական
փուլերը՝ սկսած անտիկ դարաշրջանից մինչև մեր օրերը՝ անդրադառնալով
նաև հայ մարդասիրական մտքի պատմությանը: Այդ փուլերը հետազոտողը
դիտարկում է ամբողջության մեջ բացահայտելով դրանցից յուրաքանչյուրի
առանձնահատկությունները և հաջորդափոխության օրինաչափությունները:

Գրքի երկրորդ՝ «Օտարման» հիմնախնդրի հարցի շուրջ» գլխում գիտ-
նականը վերլուծում է «օտարման» ֆենոմենը և նրա փիլիսոփայական-
սոցիոլոգիական իմաստը, այդ թվում՝ մարքսիստական ըմբռնումը,

ներկայացնում դրա էությունը, առաջացման պատճառները, դրսևորման ձևերը և հաղթահարման ուղիները:

Երրորդ գլխում՝ «Արդի համաշխարհային հումանիստական շարժում», Գ. Ասատրյանը ուսումնասիրում է արդի համաշխարհային հումանիստական շարժման ծրագրային փաստաթղթերը՝ «Հումանիստական մանիֆեստ-I», «Հումանիստական մանիֆեստ-II», «Աշխարհիկ հումանիզմի դեկլարացիան», «Հումանիստական մանիֆեստ-2000. Նոր պլանետար հումանիզմի կոչ»:

Կրոնական ու աշխարհիկ հումանիզմի այս հիմնարար փաստաթղթերի ընդհանուր համատեքստում հեղինակը ներկայացնում է նաև հումանիզմի սահմանման հարցը, և որ ամենակարևորն է՝ գլուխն ավարտում է մեր նորանկախ հանրապետությունում հումանիստական շարժման նոր փուլի սկզբնավորման առանձնահատկությունների լուսաբանմամբ: Հետազոտության մեջ նշվում են նաև «Հումանիզմի պրոբլեմների ակադեմիա» հասարակական կազմակերպության հիմնական նպատակներն ու խնդիրները, գործունեությունը: Չորրորդ՝ «Արդի հումանիզմի դասակարգման և տարատեսակների մասին» գլխում գիտնականը, ելնելով երեք հիմնական սկզբունքներից, տալիս է մեր ժամանակներում հումանիզմի մի շարք տիպերի ու տարատեսակների դասակարգումը՝ առանձնացնելով այնպիսի տիպեր, ինչպիսիք են էքզիստենցիալ, պերսոնալիստական, էվոլյուցիոն, նոոսֆերային, էկոլոգիական, թեխստական կամ կրոնական և սոցիալական կամ քաղաքացիական հումանիզմը: Այնուհետև մանրամասն վերլուծելով դրանցից յուրաքանչյուրը՝ վերհանում է վերջիններիս արժեքավոր ու սահմանափակ կողմերը, տալիս իր գնահատականը:

Աշխատության հինգերորդ՝ «Արդի սոցիալ-տնտեսական ու քաղաքական փոխակերպումների հումանիստական չափումը» գլխում հումանիստ գործիչը կարծես մեկ անգամ ևս հիշեցնում է մեր օրերում մարդկությանը սպառնացող վտանգների ու մարտահրավերների՝ բնապահպանական հիմնախնդիրների, պատերազմների, սոցիալական անհավասարությունների, սովի ու թերսնման, անգրագիտության, միջազգային ահաբեկչության և հումանիզմին հակոտնյա նմանատիպ այլ երևույթների մասին, տալիս դրանց վերլուծությունը, մատնանշում հաղթահարման ուղիները: Ներկա դարաշրջանի գլոբալ հարցադրումների լուծման հիմնական միջոցը թերևս, ինչպես արդարացիորեն նկատում է հեղինակը, տարբեր կրոնների և քաղաքակրթությունների համագործակցությունն է, բարի կամքը, մտահոգությունը մարդկության ապագայի նկատմամբ:

Հումանիզմի հիմախնդրի մանրագնին ու հետևողական վերլուծությունը գիտնականին հանգեցնում է այն եզրակացության, որ սոցիալական սուր հակասություններով ու կոլիզիաներով լի արդի աշխարհում հումանիզմն այլընտրանք չունի: Միակ իրական ճանապարհը պատմական նոր իրողություններին, մեր դարաշրջանի ներքին պահանջմունքներին համահունչ հումանիստական աշխարհայացքի մշակումն է, հումանիզմի գաղափարների տարածումը, հասարակական բոլոր հարաբերություններում

հումանիզմի սկզբունքների ու հումանիստական նորմերի հետևողական արմատավորումը: Ընթերցելով գիրքը՝ մեկ անգամ նս համոզվում ես Ֆոյերբախի մասին Մարքսի տասներորդ թեզիսի ճշմարտացիության մեջ, թե քաղաքացիական հասարակությանն ի վերջո պետք է փոխարինելու գա մարդկային հասարակությունը կամ հասարակայնացված մարդկությունը:

Այսպիսով, ընթերցողի սեղանին է դրվել մի գիրք, որը մեր իրականության մեջ առաջին անգամ համապարփակ ու բազմակողմանի, պարզ ու հանրամատչելի, իհարկե ոչ ի վնաս գիտականության, ներկայացնում է հումանիզմի հիմնահարցերը, փորձում է դրանք փիլիսոփայական ընդհանուր պրոբլեմների եզրագծից տեղափոխել դեպի առանցք՝ դարձնելով արդի փիլիսոփայության հիմնաքարերից մեկը: Կարծում ենք, գիրքը կհետաքրքրի ոչ միայն վերոնշյալ խնդիրներով զբաղվող մասնագետներին, այլև նրանց, ովքեր մտահոգ են ներկա դարաշրջանում մարդկությանը հուզող հիմնախնդիրներով, մարդկային քաղաքակրթության ճակատագրով: Եվ որ ամենակարևորն է՝ աշխատությունը խթան կդառնա երիտասարդ գիտնականների համար շարունակել սկսած գործը, մշակել ու հղկել մեր հազարամյակի պահանջներին ու ոգուն համահունչ հումանիստական նոր պարադիգմա, որի շնորհիվ հնարավոր է հաղթահարել կամ գոնե նվազեցնել արդի դարաշրջանի սպառնալիքներն ու մարտահրավերները:

ԹԱՆԱՆՅԱՆ Գ. Գ.